

四庫全書

經部

欽定四庫全書

尚書通考卷七

元 黃鎮成 撰

禹敷土隨山刊木奠高山大川

朱子曰禹貢所記地理治水曲折多不甚可曉竊意當時治水畢却總作此一書故自冀州王都始禹自言予決九川距四海濬畎澮距川此數語極好細看今人說禹治水始於壺口鑿龍門其未敢深信方河水洶湧其勢迅激縱使鑿下龍門恐仍舊壅塞又下水未有分殺

必且潰決四出蓋禹先決九川之水使各通於海又濬  
畎澮之水使各通於川使大水有所入小水有所歸只  
是先從低處下手若下面之水盡殺則上面之水漸淺  
却方可下手九川盡通則導河之功已及八分故某嘗  
謂禹治水當始於碣石九河蓋河患惟兗為甚兗州是  
河曲處兩岸無山所以潰決常在此故自決處導之用  
功尤難蓋皆自下流殺其勢耳

按先儒謂禹貢叙治水以冀兗青徐揚荊豫梁雍為

次者蓋順五行而治之耳冀居北於五行為水水生木東方故次兗青徐木生火故次南揚荆火生土故次中豫土生金故次西梁雍所謂彛倫攸叙與鯀之汨陳五行異矣今攷禹貢所書其次第固如此然冀州京都天下根本所在禹施功先自內始蓋以重輕而論也兗青徐平田虛壤泛濫潰決之患視他州尤甚拯溺拯飢莫先於此揚荆則江漢下流次當䟽鑿以泄水勢豫雖有河濟滎洛之浸而漸居上流獨梁

雍居西北地高水患差少用功宜後此蓋以緩急而論也所謂順五行而治之者亦偶合耳









愚按禹貢記大禹治洪水別九州之事其濬鑿之功則由下以及上故始事冀兗所以治河濟之下流次及青徐揚又以治淮江之下流下流既殺乃漸治其上流故次及荆豫梁之地雍地最高水患最少施功獨後此濬鑿之序也其疏導之功則自上以達下故導山四條導水九條皆自西北以極於東南順其就下之勢自源徂流皆無壅遏之患此疏導之序也於是因山川之形便以別州域因土地之生殖以定貢

賦規模素定經緯有條此所以行無事之智也然自平成以後歷數千載兗豫之間水多決潰昔之九河碣石今已包淪於海昔之河趨伍降今乃南合清淮滎波已難指實沮洳亦非故道江漢沱潛出非一所九江滙澤名實異同讀書攷古者每病其難焉又況州郡沿革廢置不常考之傳疏卒難尋究乃蒐萃古今書志規為小圖備載禹貢所書山水地名悉註以今之郡縣庶乎讀是書者按圖易見至若南踰嶺粵

東跨遼驪和林陰山以北流沙乾竺以西亦載其畧  
以見本朝混一之盛疆理無外超逾禹蹟四垂荒漠  
部落無數第非載籍所考不能殫紀其中國州郡非  
禹貢山水所經者亦畧而不載深慚掛漏博洽君子  
幸改正焉

右山水地名註以今日郡縣圖不可容備見後山  
川貢賦圖內詳註

禹貢山川貢賦之圖

冀州

三面距河兗河之西雍河之東豫河之北八州皆言  
疆界冀不言者以餘州所至可見○晁氏曰亦以尊  
京師示王者無外之意

山

壺口山○漢地志在河東郡北屈縣東南今隰州吉鄉

縣也

今河東  
道吉州

梁山○呂梁山也在今石州離石縣東北○呂不韋曰

龍門未闢呂梁未鑿河出孟門之上酈道元謂呂梁之石崇竦河流激盪震動天地

孟門山在吉州

岐山○在汾州介休縣狐岐之山勝水所出東北流注於汾○梁岐二山河水所經治之所以開河道也

岳○太岳也周職方冀州山鎮曰霍山地志謂霍太山即太岳在河東郡彘縣東今晉州霍邑也山南曰陽

今岳陽縣地堯之所都

霍邑今霍州岳陽今晉寧路縣

碣石○地志在北平郡驪城縣西南河口之地今平州

之南○酈道元云驪城枕海有石如甬道數十里當  
山頂有大石如柱韋昭云其山昔在河口今為水所  
漸淪入於海已去岸五百餘里矣

平州今平灤路

### 原隰

太原○河東太原府

今冀寧路

覃懷○地名地志河內郡有懷縣今懷州也○曾氏曰

覃懷平地也當在孟津之東太行之西涑水出其西

淇水出其東

今懷孟路

大陸○今邢趙深三州之地爾雅高平曰陸河過信洛之北西山勢斷曠然四平故謂之大陸

邢今順德路又趙州隆平

縣有大陸澤與邢接境

川

衡漳○地志漳水二一出上黨沾縣大叟谷今平定軍樂平縣少山也名為清漳一出上黨長子縣鹿谷山今潞州長子縣發鳩山名為濁漳酈道元謂之衡水東至潞州涉縣合清漳東北至定遠軍東光縣入北

河○又按桑欽云二漳水異源而下流相合同歸於海唐人亦言漳水能獨達於海請以為瀆而不云入河者蓋禹之導河至碣石入海周定王五年河徙矜礫漸遷而東漢初漳猶入河其後河徙日東而取漳水益遠至欽時河自大伾以下已非故道而漳自入海矣故欽與唐人所言如此

樂平今為遼州在平定南東光今隸景州

恒水○地志出常山郡上曲陽縣恒山北谷在今定州曲陽縣西北恒山也東入滹水○薛氏曰東流合滹



水至瀛州高陽縣入易水晁氏曰今之恒水西南流至真定府行唐縣東入滋水又南流入衡水非古徑

矣

定州今中山府曲陽今隸保定路瀛州今河間路

衛水○地志出常山郡靈壽縣東北即今真定府靈壽縣也東入滹沱河薛氏曰東北合滹沱河過信安軍入易水

河水○按漢西域傳張騫所窮河源云河有兩源一出葱嶺一出于闐于闐在南山下其河北流與葱嶺河

合東注蒲昌海一名鹽澤去玉門陽關三百餘里其  
水停居冬夏不增減潛行地中南出積石又唐長慶  
中薛元鼎使吐蕃自隴西成紀縣西南出塞二千餘  
里得河源於莫賀延磧尾曰閼磨黎山其山中高四  
下所謂昆侖也東北流與積石河相連河源澄瑩冬  
春可涉下稍合流色赤益遠他水并注遂濁吐蕃亦  
自言昆侖在其國西南二說恐薛氏為是河自積石  
三千里而後至龍門自北而南至華陰自南而東至

底柱至孟津至洛汭至大伾又自東而北過泲水至大陸又播為九河入海之處為逆河自洛汭而上河行於山其地皆可攷自大伾而下垠岸高於平地故決齧流移水陸變遷而泲水大陸九河逆河皆難指實○釋水云河千里一曲一直

愚按漢志葱嶺于關皆在沙州西其水雖與積石河合然非正源也蓋漢時止通西域未至吐蕃界薛說為是其下流則自周定王五年河徙磧磧漢

武帝元光三年河決瓠子後又決館陶為屯氏河  
河水徙從頓丘東南流入渤海元帝永光五年河  
決清河靈鳴犢口宋建紹中河決大野溢淮泗為  
南清河金亡後河自開封北衛州決入渦河河水  
全入淮同輸于海鳴犢口今東昌瓠子今濮州館

陶今大名

大伾今  
濬州

土

白壤○孔氏曰無塊曰壤顏氏曰柔土曰壤白其色也

壤其性也

賦

田所出穀米  
兵車之類

上上錯○第一等雜出第二等也賦高於田四等地廣而人稠也林氏曰冀先賦而後田者冀王畿之地天子所自治併與場圃園廛漆林之類而征之如周官載師所載賦非盡出於田也故以賦屬於厥土之下餘州皆田之賦也故先田而後賦

愚按蔡氏言賦雜出他等者或以為歲有豐凶或

以為戶有增減皆非也意者地力有上下年分不同如周官田一易再易之類故賦之等第亦有上下年分若謂歲之豐凶戶之增減則九州皆然何獨於冀揚豫梁四州言哉按此辨前說雖當然所謂地力有上下年分不同則亦未必獨四州為然也蓋九州之賦以每州歲入多寡相較第為九等而其為等也未必自第一至第九截然以次而寡正為九等必其多寡之數有所近似故以錯而言之

是以冀賦雖第一而其數近於第二故曰上上錯  
豫賦雖第二而其數近於第一故曰錯上中梁賦  
雖第八而較第九則多於十之三故曰下中三錯  
揚賦雖第七而亦近於第六故曰下上上錯蓋錯  
者雜也言其數之相近而相雜也孟子曰貢者校  
數歲之中以為常樂歲不多取凶歲不寡取由是  
言之夏貢之法賦入皆有定又安有年分之不同  
者哉

田

中中○第五等

貢

冀獨不言篚者天子封內無所事於貢篚也

皮服○海島之夷以皮服來貢也○王炎曰北地寒故服用皮非篚貢也孔氏曰居島之夷還服其皮明水害除

入貢河道

夾右碣石入于河○北方貢賦之來自北海入河南向



西轉而碣石在其右轉屈之間故曰夾右也程氏曰  
冀為帝都東西南三面距河他州貢賦皆以達河為  
至故此三方亦不必書而其北境則漢遼東西右北  
平漁陽上谷之地其水如遼濡滹易皆中高不與河  
通故必自北海然後達河也○孔氏曰禹夾行此山  
之右唐孔氏曰則行碣石山西南行入河在碣石之  
右顧氏亦云山西曰右

兗州

東南據濟西北距河兗地最狹然居河之曲處其患尤甚用功尤難故作十三載然後賦法同於他州○唐孔氏曰據謂跨之兗州之境跨濟而過之熊氏曰西距河東距濟北濱海南接徐豫之境今兗濟德隸魏博滄景等州

川

九河○爾雅一曰徒駭二曰太史三曰馬頰四曰覆鬴五曰胡蘇六曰簡潔七曰鈎盤八曰鬲津其一則河

之經流也先儒不知遂分簡潔為二○程氏曰今滄  
州之地北與平州接境相去五百餘里禹之九河當  
在其地後為海水淪沒故其跡不存方九河未沒於  
海之時從今海岸東北更五百里平地河播為九在  
此五百里中又上文言夾右碣石則九河入海之處  
有碣石在其西北岸通趾頂皆石不應仆沒今兗冀  
之地既無此石而平州正南有山名碣石在海中去  
岸五百餘里卓立可見則是九河已淪於海明矣

澠水○許慎云汭水受陳留浚儀陰溝至蒙為澠水東

入於泗

陳留今汴梁路  
蒙縣今睢州

沮水○水經澠之下流入於睢水地志睢水出沛國芒

縣睢水其沮水與

沛今徐州睢  
水劉項戰處

濟水○發源為沆既東為濟地志云出河東郡垣縣王

屋山東南今絳州垣曲縣山也始發源王屋山頂崖

下曰沆水既見而伏東出於今孟州濟源縣二源東

源周迴七百步其深不測西源周迴六百八十五步

其深一丈合流至溫縣是為濟水歷虢公臺西南入於河復出河之南溢而為滎又東出於陶丘北又東至濟陰縣荷澤又東北至東平府壽張縣安民亭合汶水又北東至今青州博興縣入海唐李賢謂濟自鄭以東貫滑曹鄆濟齊青以入於海樂史謂今東平濟南淄川北海界中有水流入海謂之清河先儒皆以濟水性下勁疾故能入河穴地流注顯伏吳興沈氏言濟水伏流地中今歷下凡發地皆是流水世謂

濟水經過其下則濟水伏流絕河乃其物性之常事

耳

王屋在澤州陽城縣與絳接境溫縣屬孟州陶丘今曹州定陶縣濟陰亦屬曹州博興今博興州淄

川今般陽北海今益都歷下今濟南歷城歷山

漯水○漯者河之支流也地志曰漯水出東郡東武陽

至千乘入海程氏以為此乃漢河與漯殊異○通志

漢武帝元光三年春河徙從頓丘東南流入渤海是

為朝城之漯河又河至頓丘分為二一曰漯川出武

陽至千乘入渤海又漢武帝河東北過武陽今大名

朝城也而為漯河

東郡博州今東昌路有漯水千乘舊屬今益都路

澤

雷夏○地志在濟陰郡城陽縣西北今澤州雷澤縣西北也山海經云澤中有雷神龍身而人頰鼓其腹則雷然則本夏澤因雷故名雷夏

土

黑墳○墳土脉墳起也○孔氏曰色黑而墳起

田

中下○第六等

賦

貢○第九等充賦最薄言君天下者以薄賦為正也

貢篚

貢者下獻其土所有於上也○篚竹器篚屬古者幣帛則盛之以篚篚而貢焉

漆絲織文○充地宜漆宜桑故貢漆絲○織文織而有文錦綺之屬

入貢河道

浮于濟漂達于河○舟行水曰浮充州之貢賦浮濟浮



漯以達於河帝都三面距河達河則達帝都矣

青州

東北至海西南距岱岱泰山在今襲慶府奉符縣西北三十里○唐孔氏曰東北跨海至遼東皆是舜分青州為營州營州即遼東也堯時青州當越海而有諸郡也○熊氏曰遼東朝鮮等處今岡南之平濼等州皆青營之境

襲慶府今兗州奉符縣今隸泰安州

原隰

嶧夷。○今登州之地。即堯典之嶧夷。

萊夷。○今萊州之地。

川

濰水。○地志云出琅琊郡箕縣。今密州莒縣東北濰山

也。北至都昌入海。今濰州昌邑也。

琅琊今沂州  
莒縣今莒州

淄水。○地志出泰山郡萊蕪縣原山。今淄州淄川縣東

南七十里原山也。東至博昌縣入濟。今青州壽光縣也。○通志淄出泰山梁父縣西入汶。按梁父今隸兗

州奉符

此與蔡傳異○萊蕪今隸泰安州淄州今般陽路壽光縣今屬益都路

汶水○出泰山郡萊蕪縣原山今淄州襲慶府萊蕪縣也西南入濟在今鄆州中都縣也蓋淄水出萊蕪原山之陰東北而入海汶水出原山之陽西南而入濟

鄆州今東平路

土

有二種

白墳○色白而性墳平地之土也

海濱廣斥○廣漠而斥鹵海涯之地也

田

上下○第三等

賦

中上○第四等

貢篚

鹽○斥地所出

絺○細葛也

海物惟錯○非一種○林氏曰錯蓋別為一物如磬錯

之錯

絲枲。麻也。

鉛松怪石。可為器用之飾。

縻絲。山桑之絲其鞞中琴瑟之絃蘇氏曰東萊有之。  
愚按八州言貢復別言篚者篚所以盛精緻之物。  
非織文則織縞之屬是也。若漆絲鹽絺之類其重  
且多非可以篚盛之故別言也。

入貢河道

浮于汶達于濟。不言達河者因於兗也。

### 徐州

東至海南至淮北至岱西不言濟者岱之陽濟東為徐岱之北濟東為青言濟不足以辨也。○熊氏曰徐州東抵海南距淮北跨岱西接豫州之境地雖不廣蘇氏以徐州三面距山一面背平野曠土徐即魯境地連淮海

### 山

蒙山。地志在泰山郡蒙陰縣西南。今沂州費縣也。林

氏曰：即語東蒙詩，奄有龜蒙。

羽山。地志在東海郡祝其縣南。今海州朐山縣也。林

氏曰：即殛鯀處。

海州今海寧州隸淮東道

嶧山。地志東海郡下邳縣西有葛繹山，古文以為嶧

山。下邳，今淮陽軍下邳縣也。

下邳今邳州隸河南江北道，嶧山即生孤

處

原隰

東原。漢之東平國即今之鄆州也。後人以其地之平，故謂之東平。又按東原在徐之西北，而謂之東者，以在濟東故也。

鄆州今東平路

### 澤

大野。地志在山陽郡鉅野縣北。今濟州鉅野縣也。鉅即大也。按水經濟水至乘氏縣分為二，南為荷北為濟。酈道元謂一水東南流，一水東北流入鉅野澤，則大野為濟之所絕其所聚也大矣。何承天曰：鉅野南



導洙泗北連清濟又鄆州中都西南有大野陂皆大

野之地也

鉅野縣今屬濟寧路有大野澤

川

淮水○水經云出南陽平氏縣胎簪山禹只自桐柏山

導之耳○桐柏地志在南陽平氏縣東南今唐州桐

柏縣也沂入於泗泗入於淮東至淮浦入海曾氏曰

淮之源出於豫之境至揚徐之間始大其汎濫為患

尤在於徐故於此言之

淮今在海寧州入海

沂水。地志沂水出泰山郡蓋縣艾山今沂州沂水縣也南至下邳西南入泗曾氏曰徐州水以沂名者非一酈道元謂水出尼丘山西北徑魯之雩門亦謂之沂水又水出太山武陽之冠石山亦謂之沂水而沂水之大則出太山也

古沂水入泗泗水入淮今泗入河與淮合矣

泗水。出魯國汴縣桃虛西北陪尾山源有泉四四泉俱導因以為名西南過彭城又東南過下邳入淮卞

縣今襲慶府泗水縣也

泗水縣今隸兗州

通志云其源出泗水縣西南流有洙水入焉又西南至方與縣荷水入焉其水出乘氏方與今單州魚臺又云有鄆水至高平湖陸入泗水又南至彭城名曰沛水有睢水入焉又西南至下邳沂水入焉又南至楚州山陽入淮此水今人謂之清河或云泗水出鄆州梁山泊

許慎說文云泗水受沛水東入淮

按泗受沛者桑欽云濟水至濟陰乘氏縣分為二

一水東北流為北濟一水南流為南濟通志云今此水與濟不通但荷水亦自乘氏至方與入泗而荷水通濟則泗可以達荷荷可以達濟而自濟可以通河矣

土

赤埴墳。埴土黏曰埴埴膩也黏泥如脂之膩也

田

上中。第二等

賦

中中○第五等

貢篚

土五色○徐土雖赤而五色之土亦間有之王建大社於國中其壝東青土南赤土西白土北驪土中央豐以黃土將建諸侯鑿取其方面之土苞以黃土苴以白茅以為土封

夏翟○雉具五色其羽中旌旄染人之職秋染夏鄭氏

曰染夏染五色也出羽山之畎其名山以此歟

孤桐○特生之桐其材中琴瑟以特生向日者為貴出

嶧山之陽

浮磬○出泗水之濱非必水中蓋浮生土中不根着者  
蠙珠○出淮之夷蠙蚌之別名

魚○今濠泗楚亦貢淮白魚

玄○赤黑色幣也

織縞○皆繒也黑經白緯曰織縞曰繒禮曰及期而大

祥素縞麻衣中月而禪禪而織則織亦繒也

入貢河道

浮于淮泗達于河。灋水受浚儀陰溝東入於泗泗入於淮淮泗之可以達於河者以灋至於泗也

揚州

北至淮東南至於海。熊氏曰北距淮東南至海西抵荊州之境其地乃淮東西江東西及兩浙閩粵之地

澤

彭蠡。地志在豫章彭澤縣東合江西江東諸水跨豫章饒州南康軍三州之地所謂鄱陽者是也

朱子曰彭蠡之澤在大江之南自今江州湖口縣南跨南康軍饒州之境以接於隆興府之北瀰漫數十百里其源東自饒徽信州建昌軍南自贛州南安軍西自袁筠以至隆興府分寧武寧諸邑方數千里之水皆會而歸焉北過南康揚瀾左里則兩岸漸迫山麓而湖面稍狹遂東北流以趨湖口而入於江以地



勢北高南下故其入江反為江水所遏而不得遂因卻而自潞以為是數十里之大澤也

蔡氏曰古今記載皆謂彭蠡今之番陽其澤在大江之南去漢水入江之處尚七百餘里其入江之處西則廬阜東則湖口皆石山峙立水道狹甚不應漢水入江之後乃橫截而南入於番陽且番陽合數州之流初無仰於江漢而成也經言東匯澤以下蓋記者之誤鄭漁仲以為衍文是也

臨川吳氏曰東匯澤為彭蠡六字舊本誤在導漾條  
遂致紛紜異論蓋鄂州北對漢陽軍大別山漢水自  
北來入江合流江水與之會水之合流曰匯故曰東  
迤北會于匯不言會於漢者以漢有漾漢滄浪之異  
名不可指定而言故但曰會于匯江漢合流之後至  
江州德化縣又六十里有水南來入江合流即東匯  
澤為彭蠡也

震澤○太湖也周職方揚州數曰具區地志在吳縣之

西南五十里今蘓州吳縣也具區之水多震而難定  
故謂之震澤

川

三江○庾仲初吳都賦註松江下七十里分流東北入  
海者為婁江南流者為東江併松江為三江其地今  
已名三江口○唐孔氏云吳地記同○蘓氏謂岷山  
之江為中江岷冢之江為北江豫章之江為南江然  
江漢會於漢陽數百里至湖口而後與豫章江合不

復可指為三矣。顏師古以為中江南江北江。郭景純以為岷江浙松江。韋昭以為松江錢塘江浦陽江。王介甫以為一江自義興一江自毗陵一江自吳縣。陳氏曰皆據所見而言非禹舊跡也。薛士龍言震澤下有三江入海彼以目驗之恐其說之必然也。

江。出岷山地志在蜀郡湔氐道西徼外在今茂州汶山縣東別流於梁為沱又東至長沙下雋縣西北澧

水入焉又東過九江九江今洞庭也又東至岳州巴陵縣又東會彭蠡湖口之水又東入於海在今通州

靜海縣

長沙今潭州路

按漢水至武昌入江導江條何以不記吳氏謂東迤北會于滙乃漢水合流之處其說是也又經言東至于澧乃澧州界非澧水也澧水自入洞庭與江相遠今言下雋西北澧水入者非也

土

塗泥。水泉濕也。下地多水其土淖。

田

下下。第九等

賦

下上上錯。第七等雜出。第六等言下上上錯者以本設賦九等分為三品。下上與中下異品故變言上錯也。

貢篚

金三品。○金銀銅也。

瑤琨。○玉石名。

篠。○材中於矢之筈。

蕩。○材中於樂之管亦可為符節。

齒草羽毛。○象有齒犀兕有草鳥有羽獸有毛。

木。○榱桷豫章之屬。○齒草可以成車甲羽毛可以為

旌旄木可脩棟宇器械之用。

卉服。○葛越木綿之屬。

織貝。錦名織為貝文。今南夷木綿之精好者亦謂之吉貝。海島之夷以卉服來貢織貝之精者則入篚焉。橘柚。小曰橘大曰柚。必錫命而後貢。

入貢河道

汭于江海達于淮泗。順流而下曰汭。汭江入海自海入淮泗不言達河者因於徐也。禹時江淮未通故汭於海至吳始開邗溝隋人廣之至江淮舟船始通也。

荊州



北距南條荆山南盡衡山之陽言陽者其地不止此  
山而猶包其南也。熊氏曰荆州之地北接雍豫之  
境南逾五嶺越雖上古未通亦當在要荒之服東抵  
揚州之境西抵梁州及西南夷等處皆楚地也。曾  
氏曰荆及衡陽即今湖南北之地今江西亦半屬荆  
州

山

荆山。此南條荆山地志在南郡臨沮縣北今襄陽府

南漳縣也

衡山○南嶽也地志在長沙國湘南縣今潭州衡山縣也

川

漢水○始出為漾東流為沔又為漢又為滄浪之水實一水而異名也水經曰漾水出隴西郡氐道縣嶓冢山東至武都常璩曰漢水有兩源北東源也即所謂嶓冢導漾者其西源出隴西嶓冢山會泉治源曰沔

逕葭萌入漢東源在今西縣之西西源在今三泉縣之東也酈道元謂東西兩川俱出蟠冢而同為漢水者是也水源發於蟠冢為漾至武都為漢又東至武當縣北四十里漢水中有洲曰滄浪洲水曰滄浪水至復州景陵縣界過三澁水觸大別山至漢陽軍漢陽縣入江○大別山在今漢陽軍漢陽縣北正荊州之域

西縣今屬興元路武當均州縣景陵今沔陽府縣

按武都今階州乃出紫泥處今鳳州乃漢武都郡

去階州千餘里此武都必鳳州也

九江○即今之洞庭也水經言九江在長沙下雋西北  
楚地記曰巴陵瀟湘之淵在九江之間今岳州巴陵  
縣即楚之巴陵漢之下雋也洞庭正在其西北則洞  
庭為九江審矣今沅水漸水元水辰水叙水澧水資  
水湘水酉水皆合洞庭意以是名九江也○潯陽地  
記云一曰烏白江二曰蚌江三曰烏江四曰嘉靡江  
五曰畎江六曰源江七曰廩江八曰提江九曰箇江

○張須元緣江圖云一曰三里江二曰五洲江三曰嘉靡江四曰烏上江五曰白蚌江六曰白烏江七曰箇江八曰沙堤江九曰廩江。○漢志九江在廬江郡之尋陽縣今詳漢九江郡之尋陽乃禹貢揚州之境而唐孔氏以為九江之名起於近代未足為據若派別為九沙水相間乃為十有七道今尋陽之地將無所容反復參攷則九江非尋陽明甚胡氏以洞庭為九江者得之曾氏亦曰過九江至於東陵東陵今之

巴陵今巴陵之上即洞庭也因九水所合遂為九江

廬江郡今廬州尋陽今盆城江州

沱水○爾雅曰水自江出為沱今按南郡枝江縣有沱

水然其流入江而非出於江也華容縣有夏水首出

於江尾入於沔亦謂之沱

枝江今江陵路縣華容今岳州縣

○王炎

曰沱水在今江陵府枝江縣土人謂枝江為百里洲

夾江沱二水之間其與江分處謂之上沱與江合處

謂之下沱

潛水。爾雅曰水自漢出為潛。王炎曰隋志南郡松滋縣有淦淦即古潛字。今松滋分為潛江縣矣。孔氏於梁州沱潛下注云沱潛發源此州入荊州。唐孔氏曰以二州沱潛為一者然彼州山水古今不可移易。孔為武帝博士地理志無容不知。蓋以水從江漢出者皆曰沱潛。但地勢西高東下。雖於梁州合流還從荊州分出。猶如濟水入河還從河出。故孔舉大畧為發源梁州耳。

松滋潛江今江陵路二縣名

澤

雲夢。周官職方荊州其澤藪曰雲夢方八九百里跨  
江南北華容枝江夏安陸皆其地也左傳楚子濟  
江入於雲中又楚子以鄭伯田於江南之夢合而言  
之則為一別而言之則二澤也

朱子曰江陵之下連岳州是雲夢

江夏屬武昌在江  
南安陸屬德安府

北在江

土



塗泥○與揚州同

田

下中○第八等

賦

上下○第三等賦高於田五等者地闊而人工修也

貢篚

羽毛齒革金三品○荆之貢大抵與揚州同

柁榦○木似櫓可為弓榦

栝柏。栝柏葉松身柏木名。

礪砥。礪磨石之麤者砥磨石之細者。

弩。石中矢鏃之用肅慎氏貢石弩是也。

丹。丹砂也。

筵簞。竹名竹之堅者材中矢筈。

楷。木名可以為矢肅慎氏貢楷矢是也。

菁茅。有刺而三脊所以供祭祀縮酒之用既包而又匣之所以示敬也管子云江淮之間一茅三脊今辰

州麻陽縣苞茅山出苞茅有刺而三脊

玄纁。玄見上纁絳色幣也

璣組。璣珠不圓者組綬類

大龜。尺有二寸所謂國之守龜非可常得若偶得則納錫於上納錫者下與上之辭重其事也

入貢河道

浮于江沱潛漢逾于洛至于南河。江沱潛漢其水道之出入不可詳而大勢則自江沱而入潛漢逾越也

漢與洛不通故舍舟而陸以達於洛自洛而至於南河也

# 豫州

熊氏曰豫州居天下之中四方道里適均湯之亳今河南偃師成王之洛邑今河南洛陽縣其地北距河南抵荆山東抵徐西抵雍梁今為河南府號陝鄭汝陳蔡唐鄧汴宋等州之地

川

伊水。○山海經云熊耳之山伊水出焉東北至洛陽縣  
南北入洛熊耳在上洛縣南今商州上洛縣

伊水出熊耳山東北入洛洛水出冢嶺山至鞏縣入  
河灋水出潛亭東南入洛澗水出新安亦入洛

洛水。○地志云出弘農郡上洛縣冢嶺山水經謂之謹舉  
山今商州洛南縣冢嶺山至鞏縣入河今河南府鞏  
縣

灋水。○地志云出河南郡穀城縣潛亭北今河南府河

南縣西北有古穀城縣其北山實瀍水所出也至河南府偃師縣入洛

澗水。地志云出弘農郡新安縣東南入於洛新安在今河南府新安澗池之間今澗池縣東二十三里新安城是也城東北有白石山即澗水所出酈道元云世謂之廣陽山然則澗水出今之澗池至新安入洛也

今按唐孔氏引地理志云伊水東北入洛瀍水東

南入洛澗水東南入洛則澠澗二水各入洛通志  
以為澗水東南入澠澠水至河南入洛則澠澗合  
流而後入洛二說不同當考

澠池縣今屬陝州

滎水。濟水自今孟州溫縣入河潛行絕河南溢為滎  
在今鄭州滎澤縣西五里教倉東南教倉者古之教  
山也按今濟水但入河不復過河之南滎瀆水受河  
水有石門謂之滎口石門鄭康成謂滎今塞為平地  
滎陽民猶謂其處為滎澤酈道元曰禹塞淫水於滎

陽下引河東南以通淮泗濟水分河東南流漢明帝  
使王景即滎水故瀆注浚儀謂之浚儀渠漢志謂滎  
陽縣有狼蕩渠首受濟者是也南曰狼蕩北曰浚儀  
其實一也

滎澤今隸汴梁  
滎陽隸鄭州

今按通志汴水一名鴻溝一名官度水一名通濟  
渠一名狼蕩渠或云狼蕩渠別汴首受河水自汜  
水縣東南過滎陽陳留睢陵符離至泗州入淮又  
云睢水首受汴水班云首受狼蕩水疑狼蕩即汴



也自浚儀縣東經陳留梁譙沛彭城縣入泗水浚  
儀近改為祥符然則浚儀渠亦名狼蕩渠即王景  
所注之渠非鴻溝之汴即或云別汴者是也

汴水屬鄭

州陳留屬汴梁符離今宿州睢陵今歸德有睢陽  
縣梁今歸德沛今徐州祥符屬汴梁譙屬亳州

波水○周職方其川熒雒其浸波滢爾雅云水自洛出  
為波山海經曰婁涿之山波水出其陰北流注於穀  
二說不同

按通志穀水出澠池縣陽穀谷東南至河南入洛

則波水當在河南之地

澠池今屬陝州

### 澤

荷澤。地志在濟陰郡定陶縣東。今興仁府濟陰縣南三里。其地有荷山。故名其澤為荷澤也。蓋濟水所經。水經謂南濟東過寃句縣南。又東過定陶縣南。又東北荷水東出焉。是也。

定陶濟陰並屬曹州

按通志云荷水首受濟東南入泗。蓋上流通濟也。孟豬。爾雅作孟諸。地志在梁國睢陽縣東北。今南京

虞城縣西北孟諸澤是也

梁國南京  
今歸德府

土 有二等

壤。不言色者其色雜也

下土墳壚。壚疏也。顏氏曰玄而疏者謂之壚。  
高地則壤下地則壚

田

中上。第四等

賦

錯上中。第二等雜出第一等

貢篚

漆臬絺紵纈續。續細綿也

磬錯。治磬之錯非常用之物故錫命然後納

入貢河道

浮于洛達于河。豫去帝都最近豫之東境徑自入河  
豫之西境則浮於洛而後至河也

梁州

東距華山之南西據黑水。熊氏曰梁州今全蜀之地成都潼川興元利州夔州等路五十四州之地是也。北與秦隴接境實為天下要脊。

山

岷山。地志在蜀郡湔氐道西徼外在今茂州汶山縣江水所出也。晁氏曰蜀以山近江源者通為岷山連峯接岫重疊險阻不詳遠近青城天彭諸山之所環遶皆古之岷山青城乃其第一峯也。

嶓山。嶓冢山地志在隴西郡氐道縣漾水所出又云  
在西縣今興元府西縣三泉縣也蓋嶓冢一山跨於  
兩縣

蔡山。輿地記在今雅州嚴道縣

蒙山。地志蜀郡青衣縣今雅州名山縣酈道元謂山  
上合下開沫水徑其間溷崖水脉漂疾歷代為患蜀  
郡太守李冰發卒鑿平溷崖則此二山在禹為用功  
多也

華山。○即太華地志在京兆華陰縣南今華州華陰縣二十里也

西傾山。○地志在隴西郡臨洮縣西今洮州臨潭縣西

南今臨洮縣西疆山

川

沱水。○此江別流之在梁州者地志蜀郡郫縣江沱在東西入大江郫縣今成都府郫縣也。○又地志蜀郡汶江縣江沱在西南東入江汶江縣今永康軍導江

縣也

永康今  
灌州

潛水。地志巴郡宕渠縣潛水西南入江宕渠今渠州  
流江縣也。酈道元謂宕渠縣有大穴潛水入焉通  
置山下西南潛出南入於江。又地志漢中郡安陽  
縣潛谷水出西南入漢。潛音安陽縣今洋州真符縣  
也。按潛水西南入漢者入葭  
萌之西漢非沔水之漢也

愚按荆梁二州皆言沱潛而地志水經所指各異  
者蓋名同耳。荆州之沱潛則可以逾洛至河梁州



之沱潛則自入江孔氏以為發源梁州入荊州者  
附會之說也故穎達但言孔氏必見地志猶濟入  
河還從河出皆非的論大抵天下之水有名同而  
流異者有水同而名異者不可牽合以求其必同  
但不知禹所道者的指何水耳

黑水。地志出犍為郡南廣縣汾關山水經出張掖雞  
山南至燉煌過三危山南流入南海唐樊綽云西夷  
之水南流入南海者凡四曰區江曰西珥河曰麗水

曰瀾渚江皆入南海其麗水者即古之黑水也三危  
山臨峙其上。蔡氏曰按梁雍二州西邊皆以黑水  
為界是黑水自雍之西北而直出梁之西南也中國山  
勢岡脊大抵皆自西北而來積石岷山西傾岡脊以東  
之水既入於河漢岷江其岡脊以西之水即為黑水  
而入於南海地志水經樊氏之說雖未詳的實要是  
其地也程氏曰樊綽以麗水為黑水者恐其狹小不  
足為界其所稱西珥河者與漢志葉榆澤相貫廣處

可二十里既足以別界二州其流又正趨南海又漢  
滇池即葉榆之地武帝初開滇舊時其地古有黑水  
舊祠而綽及道元皆謂此澤以榆葉所積得名則其  
水之黑似榆葉積漬所成且其地乃在蜀之正西又  
東北距宕昌不遠宕昌即三苗種裔與三苗之叙於  
三危者又為相應其證驗莫此之明也

張掖今甘州  
燉煌今沙州

愚按李氏聲教圖烏海自三危至吐蕃南合麗水  
川徑天竺之東以入南海在雍梁二州之西必黑

水也。又李京《雲南志》：西珥河即葉榆水，在大理點蒼山下方，圍三百餘里，勢如人耳，故名。其源不出三危，且在中慶西境，去梁雍絕遠，不可以別界二州矣。樊說雖未備，頗為近之。

桓水。○水經曰：西傾之南，桓水出焉。

潛水。○酈道元曰：自西傾而至葭萌，浮於西漢，西漢即

潛水也。

葭萌，今四川廣元路。水至重慶路入江。

沔水。○蘇氏曰：漢始出為漾，東南流為沔，至漢中東行。

為漢沔

漢中今興元府路

原隰

和夷。地名嚴道以西有和川有夷道或其地也。

晁氏曰和夷二水名和水今雅州滎經縣北和川水自蠻界羅岳州東西來逕蒙山所謂青衣水而入岷江者也夷水出魚復縣東南過佷山縣南又東過夷道縣北東入於江今詳二說皆未可必但經言底績者三覃懷原隰既皆地名則此或地名因水未可知。

也。唐孔氏亦曰和夷平地之名

土

青黎。黎黑也。孔氏曰沃壤也。

田

下上。第七等

賦

下中三錯。第八等雜出第七第九等

貢

璆鐵○璆玉磬鐵柔鐵

銀○鐵先於銀者鐵多於銀也

鏤○剛鐵可以刻鏤者

砮磬○石磬

熊羆狐狸織皮○四獸之皮製之可以為裘其毳毛織之可以為罽

愚按梁雍二州言貢不言篚者蓋篚所以盛精緻之物隨所出有無而言也

入貢河道

西傾因桓是來浮于潛逾于沔入于渭亂于河

酈道元曰自西傾而至葭萌浮於西漢西漢即潛水也自西漢遡流而屆於晉壽界阻漾枝津南歷岡北迤邐接漢沔歷漢川至於褒水逾褒而暨於衙嶺之南溪灌於斜川屆於武功而北以入於渭經言沔渭而不言褒斜者因大以見小也褒斜之間絕水百餘里故曰逾然於經文則當曰逾於渭今曰逾於沔此



又未可曉也絕河而渡曰亂

雍州

西據黑水東距西河西河者主冀都而言也

熊氏曰雍州秦地周之岐豐鎬京漢之三輔皆此焉  
據地勢之上流當天下之要脊四塞以為固書以黑  
水西河為界而又西接弱水流沙之地則土地之廣  
漠可知大抵關中之地固是形勢但其地迫近西戎  
周秦漢唐世有羌胡之患必盡陰山與唐三受降城

及靈夏河西五郡為塞地乃可爾

山

荆山。即北條之荆地志在馮翊懷德縣南今耀州富平縣掘陵原也

岐山。地志在扶風美陽縣西北今鳳翔府岐山縣東北十里也

終南山。地志古文以太一山為終南山在扶風武功縣今永興軍萬年縣南五十里也

永興今奉元路

惇物山。地志古文以垂山為惇物在扶風武功縣今永興軍武功縣也

鳥鼠山。地志在隴西郡首陽縣西南今渭州渭源縣

西也俗呼為青雀山

渭州今鞏昌路渭源今隸臨洮府

三危山。即舜竄三苗之地或以為燉煌未詳其地歸軒鄒氏曰按後漢西羌傳註三危山在今沙州燉煌縣東南山有三峯故曰三危

積石山。地志在金城郡河關縣西南羌中今鄯州龍

支縣界

金城今蘭州

龍門山。地志在馮翊夏陽縣今河中府龍門縣

崑崙山。即河源所出在臨羌

析支。唐孔氏引鄭玄云衣皮之民居此崑崙析支渠

搜三山之野則析支渠搜皆山也析支在河關西千

餘里

河關縣今積石州析支唐吐蕃居此水上亦曰賜支

渠搜。水經曰河自朔方東轉經渠搜縣故城北蓋近

朔方之地也

朔方在銀葭西北古夏州今寧夏路等處

川

弱水。柳宗元曰：西海之山有水焉，散渙無力，不能負芥，投之則委靡墊沒及底而後止，故名曰弱。地志云：在張掖刪丹縣。薛氏曰：弱水出吐谷渾界窮石山，自刪丹西至合黎山，與張掖縣河合。又按通鑑：魏太武擊柔然，至粟水，西行至菟園，水分軍收討，又循弱水西行至涿邪山，則弱水在菟園水之西，涿邪山之東矣。涇水。地志出安定郡涇陽縣西，今原州百泉縣岍頭。

山也東南至馮翊陽陵縣入渭今永興軍高陵縣也

安定今涇州原  
州今鎮原州

渭水○地志出隴西郡首陽縣西南今渭州渭原縣鳥

鼠山西北南谷山也東至京兆船司空縣入河今華

州華陰縣也  
渭州今鞏昌路

汧水○地志作芮扶風汧縣蒲藪芮水出其西北東入

涇今隴州汧源縣弦蒲藪有汧水焉周職方雍州其

川涇汧詩曰芮鞠之即皆謂是也○孔氏曰水北曰

汭

漆水。寰宇記自耀州同官縣東北界來經華原縣合

沮水

華原今  
輝州

○唐孔氏引地志云漆水出扶風漆縣

西晁氏曰此豳之漆也。○通志云出鳳翔普潤縣東

或云出岐山經華原縣與沮水合南至富平縣入於

渭程氏曰普潤之漆入渭在澧水之上節次與經不

合

富平今  
屬輝州

沮水。○地志出北地郡直路縣東今坊州宜君縣西北

境也寰宇記沮水自坊州昇平縣北子午嶺出俗號  
子午水下合榆谷慈馬等川遂為沮水至耀州華原  
縣合漆水至同州朝邑縣東南入渭

坊州今  
鄜州

澧水○地志作鄠出扶風鄠縣終南山今永興軍鄠縣

山也東至咸陽縣入渭

鄠縣咸陽並  
屬奉元路

### 原隰

原隰○廣平曰原下濕曰隰詩曰度其隰原即指此也  
鄭氏曰其地在豳今邠州也



豬野。○地志武威縣東北有休屠澤古今以為豬野今

涼州姑臧縣也

今西涼州

土

黃壤。○黃者土之正色也林氏曰物得其常性者尊貴  
雍州之土黃壤故其田非他州所及

田

上上。○第一等

賦

中下○第六等地狹而人功少也

愚按賦等高下者地有廣狹也雍東止西河西盡  
黑水不為狹矣而千里沃壤惟關中之地積石以  
西析支之地寒早收薄不足以供故賦入寡也

貢無篚

球琳○美玉也


琅玕○石之似珠者爾雅曰西北之美者有昆侖虛之  
球琳琅玕今南海有青琅玕珊瑚屬也山海經云昆

侖山有琅玕樹

入貢河道

浮於積石至于龍門西河會于渭汭。雍之貢道有二其東北境則自積石至于西河其西南境則會于渭汭言渭汭不言河者蒙梁州之文也他州貢賦亦當不止一道發此例以互見耳。熊氏曰正道皆從渭達河惟山脊西北之地渭道不可通處必自積石之河經涉龍門而達于西河也

愚按五服之制田賦所入於天子者不過甸服而  
已其外則以封建諸侯其入貢河道惟記八州之  
貢篚與諸侯朝會之所經耳



尚書通考卷七

欽定四庫全書

經部  
尚書通考卷八至

詳校官給事中臣王鍾健

通政使司副使臣莫瞻菴覆勘

總校官庶吉士臣張能照

校對官檢討臣龔大萬

謄錄監生臣張子誠

繪圖監生臣仇瑄

欽定四庫全書

尚書通考卷八

元

黃鎮成

撰

鄭氏通志地理略序

州縣之設有時而更山川之形千古不易所以禹貢分  
州必以山川定經界使兗州可移而濟河之兗不能移  
使梁州可遷而華陽黑水之梁不能遷是故禹貢為萬  
世不易之書後之史家主於州縣州縣移易其書遂廢  
今之地理以水為主水者地脈絡也郡縣基布州道瓜

分皆由水以別焉中國之水則江河淮濟為四瀆諸水所歸苟明乎此則天下可運於掌

江水出岷山一名瀆山一名汶阜山今屬茂州汶山縣古冉駹氏漢汶山郡發源不一始亦甚微所謂濫觴者也東南百餘里至天彭山亦謂之天谷亦謂之天彭門兩山相對水徑其間其山屬今彭州又東南過成都郫縣又東南過江陽有湔水從西北來入焉江陽隋并入隆山唐改為彭山今屬眉州又南過嘉州犍為

今嘉定路又



南過戎州獋道縣北

今叙州

若水淹水從西來入焉又東

南至巴郡江州縣有羌水涪水巴水白水潛水渝水合

流入焉故庾仲雍謂江州縣對二水口右則涪內水左

則巴內水是也江州縣今渝州江津縣是

今重慶路江津縣

又

東過涪州忠州萬州又東過雲安軍雲安故朐胝縣後

周改名

今雲陽州

又東過魚復魚復今夔州奉節也逕永安

宮

在奉節縣蜀先主卒於此

及諸葛亮圖壘南

八陣圖在奉節西南七里聚細石為之各

丈高五

又東南過赤岬城

即杜詩赤甲白鹽皆山名

又東過巫峽巫溪

水入焉又東過秭歸

今歸州

又東過夷陵

今峽州路

又東過宜

都

峽州宜都縣

又東過禹斷江又東過枝江

今江陵府枝江縣

有沮

水入焉又東過石首

今江陵府石首縣

又東過華容

今岳州華容縣

有

涌水入焉又東至巴陵

今岳州巴陵縣

合於洞庭之陂其陂有

澧水從西來入焉次有沅水從西南來入焉次有湘水

從南來入焉其而東出由武昌出與漢水合而為大江

東過九江

今江州路非禹貢之九江也

有九江水合而為彭蠡陂

今鄱陽

陽

從南來入焉又東右過江寧有丹陽水從南來入焉

今鎮江路

又東左過江都

今揚州江都縣

邗溝出焉又東過江陰

今

陰州許浦入海

按入海在今通州靜海縣

班云行二千六百六十里謬

矣

淮水出唐州桐柏縣大復山東過義陽今信陽也

今信陽州

又東過褒信

今息州楚封白公於褒信在此

汝水

出今汝州

自西北來入焉

又東過安豐決水自南來入焉又東北有窮水從北來

入焉又東過下蔡

下蔡縣舊屬潁州今隸安豐路

潁水從西北來入焉

又東過壽春

今安豐路

有肥水從東南來入焉又東北有豪

水入焉又北汴水入焉酈道元云汴即浪蕩渠也又東

過鍾離

今臨濠府

又東過盱眙

今臨淮府盱眙縣

有汴水從北來入

焉又東至山陽

今淮安路

通邗溝又東泗水自東北來入焉

又東至海州東海

今海寧州

入海班云行三千二百四十里

濟水從滎陽縣北

今鄭州滎陽縣

又東過敖山北

在鄭州仲丁遷此

又

東合滎瀆今無水又東索水入焉又東過陽武縣北

今延

州陽武縣

又東過封丘縣

今汴梁封丘縣

又東過酸棗縣

今滑州

之烏

巢澤北又東過乘氏縣南

舊屬今曹州

分為荷水又東北過

鉅野

今濟寧路鉅野縣

濮水入焉又東北過壽張

今東平路壽張縣

汶

水從東北來入焉又東過須城

今東平路須城縣

漁山之東左

合馬頰水又北過臨邑

舊屬濟南

又東北過故廬城北

今濟寧路

有故廬縣

又東北灤水入焉又東北過華不注山華水入焉

在濟南路

又東北過蒲臺縣北

今般陽路古淄州

又東北過鄒平

今濟

南路鄒平縣元屬淄州

時水入焉又東北過樂安故城南

今益都路樂安

又東北過利縣西地里志曰利縣在濟城北五十里

又東北過甲下邑河分一枝入焉又東北入於海聞今

濟水多涸竭

河水自西域來其大原有三正原出昆侖山東北陬而東行一原出天竺葱嶺一原出于闐南山北行與葱嶺河合而東入於昆侖河或云張騫窮河源至葱嶺河爾故西域傳云河有兩源一出葱嶺一出于闐而沒其正原也三河合而東過蒲昌或云入蒲昌海而復東出於理不然乃東至積石山下有石門河水冒以西南流是為中國河積石山屬鄯州

今積石州

禹之所道自此始故其

詳得聞焉遂過西平即鄯州又東南過枹罕河州也有

洮水從西來入焉又東過臨洮洮州也

今臨洮府

有離水從

西來入焉又東過金城允吾縣湟水從西來入焉金城

蘭州也遂轉而北過武威涼州也

今西涼州

又北至朔方故

夏州也

今寧夏路

遂轉而東南又南過上郡白土縣固水從

西來入焉上郡綏州也

今綏德州

又南過隰州太寧縣壺口

山又南過北屈今慈州吉鄉也

漢北屈今吉州

而為采桑津又

南過龍門有汾水從東來入焉龍門縣今隸河中又南

過夏陽梁山之東又南過汾陰縣西郃陽縣東又南過蒲阪縣雷首山西蒲阪今河東也有涑水從東北來入焉又南過華陰縣潼關

今華州華陰縣

渭水從西來入焉遂轉

而東過河北縣今陝州平陸也又東過陝縣底柱山在河中分流包山而過湍急多覆溺舟船又東崤水從右入焉是謂崤津亦謂之茅津又東左過絳州垣曲縣湛水從北來入焉又東而為孟津又東過河陽縣

今孟州縣

南洛陽縣北

今河南府縣

又東過溫縣

今孟州縣

沮水從西北來



入焉又東右過鞏縣

今河南府縣

洛水從西南來入焉左過

成臯縣北沅水從北來入焉

成臯今孟州沅水

又東過大伾山

下又東汜水從南來入焉又東過滎陽縣

今鄭州縣

西北而

為棘津又東過滎陽縣鴻溝出焉鴻溝一名官度水一

名蕨蕩渠今謂之汴河大禹塞滎澤開之以引河水東

南通淮泗蕨蕩渠據桑欽所說即此也而班固又云蕨

蕩渠受濟水至陳入潁未詳其實又東北過懷州武陟

沁水入焉又東過酸棗縣西

舊屬今滑州

濮水東出焉或云

漢文帝時河決酸棗東潰金隄發卒塞之其水遂絕又東北而為延津又東北左過黎陽大伾山黎陽今通利軍治也

今濬州

有淇水從西來入焉淇水即降水也又東

北過濮陽縣

今濮州

別出而為瓠子河漢武帝時河決瓠

子水注鉅野通於淮泗發卒塞之又東北過東武陽今大名朝城也而為漯河又東北過大名館陶縣別出而為屯氏河又東北過清河靈縣別出而為鳴犢河靈縣

隋省入博平今隸博州

今東昌州博平縣

鳴犢至瀛州

今河間路

蔣

縣與屯氏河通三河今皆絕矣又北過德州平原又東

北過棣州厭次又東北過濱州渤海又東北過青州千

乘

舊屬今益都路

又東北過甲下邑別出一枝入濟又東北入

於海舊說禹道河至頓丘

舊屬魏州今大名路

分為二渠一曰漯

川出武陽

大名

至千乘入渤海

今濱州

一曰北瀆出貝丘

恩州

至大陸北播為九河同為逆河入於海舊云大陸在鉅

鹿北

鉅鹿古邢州今順德路

乃故大陸縣唐改為昭慶宋開寶改

為隆平近省為鎮入趙州臨城

今趙州隆平縣有大陸澤

然禹貢大

陸當只是汲郡

今衛州

吳澤非趙州大陸縣也鄭氏云九

河齊桓公塞之而北瀆至王莽時亦絕故世謂王莽河

今在永靜軍

今景州

然臣每疑禹之所道無二河按禹貢

文東過洛汭至于大伾北過泆水至于大陸又北播為

九河同為逆河入于海又按武帝元光三年春河水徙

從頓丘東南流入渤海是為朝城

舊屬魏州今大名路

之漯河然

則今河之入海者入渤海爾禹貢所謂入于海者由碣

石之海碣石今在平州北瀆者乃禹所道之河其後河

決漯川入於渤海故瀆遂絕九河不復通蓋故瀆在北  
漯川在東河決而東勢則然也恐非齊桓公所塞自河  
決漯川之後北瀆遂微九河皆絕但王莽河上承北瀆  
下入逆河為一河微通奈北勢高故後亦絕但由漯川  
爾大抵河自西戎入塞經秦隴陝洛夾山而行故少有  
決徙之患自河陽今孟州以下東至海千里平田虛壤故  
多奔決無定流

漢水名雖多而實一水說者紛然其原出興元府西縣

嶓冢山為漾水東流為沔水故地曰沔陽又東至南鄭

為漢水有襄水從武功

今乾州武功縣

來入焉南鄭興元治興

元故漢中郡也又東左與文水會又東過西城

今金州

旬

水入焉又東過鄖鄉縣

今均州縣

南又屈而東南過武當縣

今均州縣

又東過順陽縣有淅水自號州盧氏縣北來入焉

又東過中廬別有淮水自房陵

今房州縣

淮山東流入焉又

東過南漳

今襄陽路縣

荆山而為滄浪之水或云在襄陽即

為滄浪之水又東南過宜城

今襄陽路縣

有鄢水入焉又東

過郡敖水入焉又東南白水入焉又東過雲杜而為夏

水有潁水入焉雲杜後并入安州安陸舊屬江夏郡

今安

陸府

又東至漢陽觸大別山南入於江漢陽故夏口之地

今漢陽府

班云行一千七百六十里

泗水舊云出卞縣故城東南桃虛西北卞縣今兗州泗

水縣是說文云泗水受濟水桑欽亦云濟水至濟陰

今曹

州乘氏縣分為二一水東北流為北濟一水南流為南

濟按今此水與濟已不通矣其源出泗水縣西南流有

洙水入焉又西南至方與縣河水入焉其水出乘氏班

固亦謂之泗水方與今單州魚臺

魚臺縣今隸濟寧

又云有濼

水至高平湖陸入泗水又南至彭城

今徐州

名曰沛水有

睢水入焉又西南至下邳

今邳州

沂水入焉又南至楚州

山陽

今淮安路山陽縣

入淮此水今人謂之清河或云泗水出

鄆州

今東平路

梁山泊

洛水出商州上洛縣冢嶺山桑欽云出謹舉山恐是上

洛舊名謹舉東過熊耳山又東過盧氏縣

今嵩州盧氏縣

又東



過河南縣穀水從西來入焉又東過洛陽南伊水從西來入焉又東過偃師澠水從西來入焉又東過鞏縣東

河南洛陽偃師鞏皆河南府縣名

又北入於河班云行千七十里

渭水舊云出隴西首陽縣渭首亭南鳥鼠山首陽唐省

入渭源隸渭州

今鞏昌府路即渭州

今隸熙州在州之東

今臨洮府即古

熙州其水東過隴州汧源汧水從西北來入焉又東過鳳

翔郿縣斜水從南來入焉又東過槐里縣南澇水入焉

槐里今永興興平縣

今奉元路興平縣

又東北過咸陽縣澧水

入焉又東北過高陵涇水入焉

咸陽高陵皆奉元路縣

又東北過

富平縣

隸耀州今耀州

漆水入焉又東洛水入焉

此洛水出同州蒲城縣洛

水谷谷在荆山又按洛水出鄜州界至富平與漆沮合

又東過臨潼縣

今奉元臨潼縣

灞

水入焉又東至船司空縣入河船司空後省入華陰今

隸華州班云渭水行千八百七十里

汾水出太原

今冀寧路

汾陽縣北管涔山

今管州

汾陽今太原

治陽曲也東南過晉陽縣東晉水從縣南東流入焉又

南與文水合又西南過高梁高梁今屬洪洞

洪洞屬平陽今晉寧

路遂西行過臨汾

臨汾屬晉寧

又西過絳縣

今絳州縣

西四十里

虎祈宮北又西過王澤有澮水從東來入焉又西至汾陰縣北西入於河汾陰今河中滎河縣也班云汾水西南行千三百四十里冀州浸也

清漳水班云出上黨沾縣大壘谷

出平定州樂平少山樂平今遼州

東

北過磁州武安與濁漳合而衡流故名曰衡漳

濁漳出今潞州

長子縣發鳩山

又東北過沼州

今廣平路

曲周平恩縣又東北過冀

州武邑又東北過弓高縣弓高今為鎮隸永靜東光

今景

又東北過成平今為景城鎮隸瀛州今河樂壽

又東北過故平舒縣今河東入海入海者桑欽說

也班云至邑成入河行千六百八十里

易水出北新城東至文安入滹新城今隸涿州

滹水出靈丘縣高氏山靈丘今隸蔚州班云東至文安

入大河過郡五行九百四十里按文安今隸霸州

滹沱水班云出代郡鹵城東至文安入海過郡六行千

三百七十里按鹵城今代州今堅繁峙縣其水東經定

州

今中山府

深澤縣

深澤今隸祁州

東南即光武所度處今俗謂之

危度口又東過瀛州東城平舒

二縣今河間路

開元中盧暉於

此引潯沱東入淇道溉漕文安今隸霸州若是入海當在滄州界

### 禹貢五服之圖

五百里甸服

分為五等

百里賦納總

二百里納銍

三百里納秸服

四百里粟

五百里米

五百里侯服

分為三等

百里采

二百里男邦

三百里諸侯

五百里綏服

分為二等

三百里揆文教

二百里奮武衛

五百里要服

分為二等

三百里夷

二百里蔡

五百里荒服

分為二等

三百里蠻

二百里流

禹貢五服陳祥道曰夏之服甸侯綏要荒自甸至荒凡五服服五百里則面二千五百里矣面二千五百里則為方五千里矣

粥成五服至於五千

周之服侯甸男采衛蠻夷鎮

藩自侯至藩凡九服服五百里則面二千七百五十里矣面二千七百五十里則為方五千五百里矣蓋夏服先甸後侯而甸即畿也周服先侯後甸而畿非侯也夏之侯以當周之侯甸而綏以當周之男采周之衛蠻以當夏之要而夷鎮以當夏之荒特藩服在禹貢之外然

則周之斥大中國不過增夏五百里而已書曰弼成五服至于五千此夏五服之域也東漸于海西被于流沙朔南暨聲教此夏五服之外也孔氏謂地理志言漢之土竟東西九千三百二十里南北萬三千三百六十六里其言山川不出禹貢之域而數不同者直而計之以爲跡曲而量之以人跡異耳此說是也

蘓氏曰獨言甸服之賦內詳王賦之法而諸侯可推也蔡氏曰禹聲教所及則地盡四海而其疆理則止以五



服為制至荒服之外又別為區畫如所謂咸建五長是已若周漢則盡其地之所至而疆畫之也

馬氏曰甸侯綏為中國要荒已為夷狄聖人之治詳內略外觀五服名義可見治中國則法度宜詳治以必治也治蠻夷則法度宜略治以不治也觀至於五千見德化之遠及觀要荒二服見法度之不泛及聖人不務廣地而勤遠略可見矣

尚書通考卷八